

[Augsburg], 28. Mai 1576

An Theodor Zwinger

UB Basel, Fr. Gr. I 11, fol. 352r (nicht eigenhändig bis auf die Unterschrift).

S. D. Scheurlini reditus, ab inclyta academia vestra honorificis testimentijs ornati, nobis gratus et iucundus fuit: mihi quidem eò magis, quòd ita se praxi addixit, vt philosophiam minimè censeat esse negligendam.

D. Georgius Henischius noster die abhinc octauo (nisi quid impedierit) nuptias cum formosissima virgine, eaqué patricia, celebrabit; quarum euentum fore felicem et spero et opto. Petrus Perna aut nullas literas ad nos dedit: aut, si quas dedit, non redditae sunt.

Gemuseum libellum Plethonis et Cydonij repudiasse miror: cùm illius ne vnicum quidem exemplum habeat reliquum; huius vix tot huc miserit, vt raro et infrequenti auditorio meo satis essent; et libellum credam fore vendibilem. Sed Typographi melius ista iudicabunt: et ego de meis nugis parùm labore: quarum plures intra annos quadraginta scriptas aboleui, quam in publicum edidi: quamuis illas, si prava exempla sequi voluisse, bona fortasse cum venia publicassem. Pereat ergò mihi haec lucubratiuncula, mihi non necessaria, sed frugi adolescentibus fortasse profutura. Vale, 28 Maij, Anno 1576.

Hiero[nymus] Wolfius
tui obseruantiss[imus].